

BOSNA I HERCEGOVINA
FEDERACIJA BOSNE I HERCEGOVINE
AGENCIJA ZA NADZOR OSIGURANJA
FEDERACIJE BOSNE I HERCEGOVINE
S A R A J E V O

Na osnovu člana 100. stav (4) i člana 130. Zakona o osiguranju („Službene novine Federacije BiH“, broj 23/17), Stručni savjet Agencije za nadzor osiguranja Federacije Bosne i Hercegovine na 6. sjednici održanoj 06. 10. 2017. godine, d o n o s i

P R A V I L N I K
O DODATNIM ELEMENTIMA KOJI SE UKLJUČUJU PRI IZRAČUNU PLANIRANOG REOSIGURANJA

I OSNOVNE ODREDBE

Član 1.
(Predmet)

Ovim Pravilnikom uređuju se dodatni elementi koje društvo za osiguranje uključuje pri izračunu planiranog reosiguranja, te pravila izvještavanja o činjenicama i okolnostima koje su važne za procjenu adekvatnosti reosiguranja.

II PROGRAM PLANIRANOG REOSIGURANJA

Član 2.
(Obaveza usvajanja)

Društvo za osiguranje je dužno usvojiti program planiranog reosiguranja u okviru mjera za upravljanje rizicima.

Član 3.
(Struktura)

Program planiranog reosiguranja, pored obaveznog sadržaja, utvrđenog članom 100. stav (2) Zakona o osiguranju (u daljem tekstu: Zakon), mora sadržavati i:

1. naziv i sjedište društva za reosiguranje s iskazanim kreditnim rejtingom ukoliko postoji, prema riziku predanom u reosiguranje,
2. vrstu reosiguravajućeg pokrića (proporcionalno: kvotno reosiguranje ili reosiguranje viška sume odnosno neproporcionalno: reosiguranje viška štete ili stop loss),
3. interne procedure za sklapanje reosiguranja koje uključuju načine odabira reosiguravača, procjenu sigurnosti reosiguravača, načine praćenja reosiguravajućih ugovora, izvještavanja, te sistem unutrašnjih kontrola.

Član 4.

(Izračun samoprdržaja)

- (1) Društvo za osiguranje odredit će samoprdržaj odnosno vlastite udjele u tablicama maksimalnog pokrića iz člana 3. ovoga Pravilnika po pojedinoj vrsti osiguranja.
- (2) Pri određivanju samoprdržaja odnosno vlastitih udjela u tablicama maksimalnog pokrića društvo za osiguranje, pored navedenog u članu 100. stav (3) Zakona, uzima u obzir sljedeće:
 1. vlastitu ocjenu rizika likvidnosti i solventnosti,
 2. povrat na kapital,
 3. vjerovatnoću štetnog događaja s obzirom na strukturu portfelja društva za osiguranje, te period promatranja i visinu premije po pojedinim vrstama osiguranja odnosno vrstama reosiguranja,
 4. veličinu najveće štete,
 5. politiku društva za osiguranje s obzirom na preuzimanje rizika.
- (3) Iznimno od stava (2) ovog člana, kod pojedinačnih ugovora o reosiguranju, samoprdržaj društva za osiguranje odnosno društva za reosiguranje može biti manji nego u tablicama maksimalnog pokrića.

Član 5.

(Izračun najveće vjerovatne štete)

- (1) Najveću vjerovatnu štetu društvo za osiguranje procjenjuje uzimajući u obzir sva obilježja rizika.
- (2) Najveća vjerovatna šteta procjenjuje se u procentu od ugovorene osigurane sume odnosno limita pokrića i izražena je u apsolutnom iznosu.
- (3) Društvo za osiguranje je dužno propisati postupak za procjenu najveće vjerovatne štete koji se koristi prilikom preuzimanja rizika. Ukoliko se radi o sumi osiguranja od 2 miliona KM ili više, neophodan je obilazak predmeta rizika i sačinjavanje izvještaja o utvrđenoj najvećoj vjerovatnoj šteti koji mora biti dokumentovan i obrazložen u pisanom obliku i urađen po propisanom postupku i u skladu s pravilima struke i definicijom najveće vjerovatne štete koju je društvo usvojilo.
- (4) Akt iz stava (3) ovog člana društvo je dužno donijeti u roku od 30 dana od dana stupanja na snagu ovog Pravilnika.
- (5) Osnovica za određivanje najveće vjerovatne štete u pravilu je 100% ugovorene osigurane sume – totalna šteta, odnosno reosigurane sume – totalna šteta, dok se niži postotak može koristiti samo u iznimnim slučajevima kada za to postoje jasni razlozi.

III IZVJEŠTAVANJE

Član 6.

(Izvještavanje)

- (1) Društva za osiguranje dužna su Agenciji za nadzor osiguranja Federacije Bosne i Hercegovine (u daljem tekstu: Agencija za nadzor) za svaku poslovnu godinu dostaviti:

1. program planiranog reosiguranja, koji će obuhvatiti elemente iz člana 100. Zakona i člana 3. ovog Pravilnika s pregledom reosiguravajuće zaštite društva za osiguranje i mišljenje imenovanog ovlaštenog aktuaru društva o primjerenosti programa reosiguranja,
 2. statističke podloge posmatranih područja i razdoblja uključujući statističke metode na osnovu kojih društvo za osiguranje ocjenjuje izloženost riziku, interne procedure o unutrašnjim kontrolama koje koristi kako bi se postiglo izbjegavanje kumulacija rizika,
 3. izvještaj imenovanog ovlaštenog aktuaru kojim se potvrđuje adekvatnost vlastitih udjela u tablicama maksimalnog pokrića društva za osiguranje, s obzirom na kriterije iz člana 4. ovog Pravilnika, te primjerenost postupaka, osnovica i mjerila društva za osiguranje kod određivanja najveće vjerovatne štete za pojedine preuzete osigurane rizike.
- (2) Rok za dostavljanje izvještaja iz stava (1) ovoga člana je 31. 01. tekuće poslovne godine.
- (3) Statističke metode koje koristi društvo za osiguranje dostavljaju se s prvim izvještajem dostavljenim od strane društva nakon stupanja Pravilnika na snagu, a naknadno se dostavljaju samo u slučaju promjene metodologije.
- (4) Iznimno od st. (1) i (2) ovog člana društvo za osiguranje je dužno revidirati program planiranog reosiguranja i unutar poslovne godine ako se promjene okolnosti u kojima društvo posluje, ako se promijeni strategija preuzimanja rizika, odnosno ako se promijeni status reosiguravatelja i o tome obavijestiti Agenciju za nadzor u roku od 10 dana od dana usvajanja revidiranog programa.

Član 7.
(Reosiguranje)

Odredbe ovog Pravilnika na odgovarajući način primjenjuju se i na društvo za reosiguranje obzirom na retrocesiju.

IV ZAVRŠNE ODREDBE

Član 8.

(Usklađivanje poslovanja društava za osiguranje, odnosno društva za reosiguranje)

Društvo je dužno uskladiti svoje poslovanje s odredbama ovog Pravilnika najkasnije u roku od 30 dana od dana stupanja na snagu istog.

Član 9.
(Stupanje na snagu)

Ovaj Pravilnik stupa na snagu osmog dana od dana objave u „Službenim novinama Federacije Bosne i Hercegovine“.

PREDSJEDNIK
STRUČNOG SAVJETA

mr.sci. Edita Kalajdžić s.r.

Broj: 021-2728-2/17
Sarajevo, 06. 10. 2017. godine